

萬有文庫

第二集七百種

王雲五主編

萬曆重修二百八十八卷本

明會典

(七十二)

申時行等重修

商務印書館發行

本卷八十二百二修

典

明

(十二)

重等行時申

書叢本基學國

明會典卷之一百四十二兵部二十六

【守衛】食錢牌面附】

國初置都鎮撫司總領禁衛後又以親軍諸衛分番守衛而改都鎮撫司爲留守五衛每衛設指揮五員關領內府銅符日輪二員點閘守衛官軍夜亦如之法例漸密具載於後

洪武二十七年聖旨榜例自古到如今各朝皇帝差軍守衛皇城務要本隊伍正身當直上至頭目下至軍人不敢頂替這等守衛是緊要的勾當若是頂替干係利害撥散隊伍守衛尤其利害且如論隊伍守衛撥那所軍若用軍多盡本所守衛若用少或五百三百二百一百務要整百戶守衛若軍別無事故各各見在衛所其當該管軍人員不行仔細檢點照依原伍上直致令小人賣放或間居在衛所或私自縱放不在衛所點視不到定將本管指揮千百戶衛所鎮撫總小旗各杖一百指揮降千戶調邊遠千戶降百戶調邊遠百戶降總旗調邊遠衛鎮撫降所鎮撫調邊遠總旗降小旗調邊遠小旗降做軍調邊遠如是受財賣放以致隊伍不全係是圍宿重事不問賊多少處以重罪○一當直之時不問全所或一百戶上直必定無全伍何故無全伍且如父母妻子或死喪或因病或本身有病或嫁娶或公差或因事被監或種植蔬菜五穀看守果木或婦人產難此數等皆是軍人有妨上直之時理合明白開寫是數事內何

等妨占。自此等別無虛冒。難以問罪。理合逐件准說。○一若本無前條數事。倚法爲姦。妄稱數事內一事。不行上直。非官吏該管容縱罪。坐本軍杖一百。流煙瘴。若所管官旗人等受財冒爲此事。不拘賊多少。處以重罪。○一軍人在京衛分近處。不出百里之外。死喪慶弔。許告假行。本衛親管官旗首領官吏即時准告放行。以快人情。敢有留難。笞五十。上官罰俸一月。○一凡當直之日。務要各千戶差調本管百戶。各帥本隊伍旗軍一名一名。務要著實。不許頂替。若有事故。儘有事故開除。見在不問多少。從實當直。若將本隊伍一百戶軍調做三四次當直。或一旗一直。兩旗一直。或五名一直。三名一直。多少不等。拆散隊伍。處以重刑。家遷化外。○一若死喪。親姻疾病。產難。隨即告知本管官旗。即時放行。毋得刁蹬。畱難。若有刁蹬。畱難。即時親身赴御前陳告。若當直之時。本身若有暴疾。本管官旗即放歸營所。請醫調治。或看視遲慢。放回猶豫。致令病甚。親管小旗杖一百。總旗杖九十。百戶住俸一月。其病軍食錢帶去。不必瑣碎來奏。○一若軍人別無餘丁。家有父母。或父。或母。一時染病。不能痊可。似這等軍。許不當直。告知明白。在家侍奉。父母病疾。管甚麼十日。五日。半月。一月。不拘幾時。直待父母痊可。纔方上直。若父母病痊。及父母無病。詐稱有病。開驗是實。治以重罪。輕則流入煙瘴。○一軍人單夫隻妻者。若妻有病。本軍許不上直。看覷妻室病痊之後。纔方上直。設或無病。稱病。病痊不直。開驗是實。調入煙瘴。○一若官旗首領官吏。不畏法度。擅將上直軍人。撥散隊伍。許本隊伍內。不問軍旗人等。赴御前陳奏。開驗是實。賞鈔五十錠。作弊官吏。處以

重刑。○一凡點大軍，病疾不許扛擡赴點。幼軍自十三赴點，十二以下，皆不赴點。止點視於營中。○一凡一應關請有孕婦，女不許入內。違者，本管官旗杖一百。若不令官旗知會，若孕私入者，罪坐本婦。○一凡當直之時，守衛何門，本日外人於內辦事，事畢仍於本門回還。若自本門入，不自本門出，不問是何等人，却被別門擒拏。雖係國戚，亦當即時奏聞。區處將所入之門，守直官旗軍人，俱各處以重刑。擒拏之門，直守軍旗受賞。○一凡整點大軍，本管官旗私自縱令正軍不入隊伍，臨點之際，却乃雇覓他人代替點視者，官旗與雇覓之人，俱各處以重刑。有能首告者，賞鈔一百錠。官首告陞一階。總旗首告，陞百戶。小旗首告，陞百戶。軍人首告，陞百戶。仍賞鈔一百錠。本管告旗自行覺舉者，不在陞賞之例。○一在京軍人戶下壯丁多者，或弟兄子姪，或見贅在戶女壻，凡遇上直做工、公差、許輪流代替，不輪者聽。若遇出征調遣，正軍親行，正軍軟弱，戶下壯丁願隨行代替者，亦聽。本管官旗首領官吏，敢有刁蹬者，杖一百。罷職。總小旗首領官吏，邊遠充軍。○一遇朝參，先放直日都督將軍、散騎、帶刀人員及應直帶刀指揮、千百戶、衛所鎮撫進，然後百官進朝。不許攙越混雜。○一守衛官員，凡遇當直，須待朝後辰時方許交班。違者問罪。○一凡內官、內使、小火者出入各門，守門官軍務要搜檢精細，端捏交檔，或將帶金銀段疋衣服等項，須憑勘合放出。或有公差幹辦事務，明白附寫前去某處公幹，及辨驗身上衣服是何顏色，見數明白，隨即附記事畢回還，依數點進。但有點對不同，即時奏聞。○一內官、內使，須要比對銅符，依前搜檢放出。若內官、內

使出門本無銅符、及有銅符不行比對明白、輒便放出者、守門官軍治以重罪。○一各處進納官物長解、及內府做工諸色人等誤帶鈔貫等物入門、守門官軍務要用心搜檢、止當寄放、方許進門。若進門之時、搜驗潔淨、比候出門、搜出有帶出物件、即時拏奏。○一官員軍民人等入奏事務、守衛官軍人等不許問其緣故、所將文書亦不許開看、隨即徑直引奏。若擅問緣故、及將文書開看者、依律論罪。

承天門午門紅牌

一官員人等說謊者處斬

一凡大小官員奏事語言不一、轉換支吾面欺者、斬

凡各衛分定地方

皇城四門、自午門左、至闕左門東、第五鋪、午門右、至闕右門西、第五鋪、端門左、至承天門左橋南端門右、至承天門右橋南、長安左門、至外皇城以東、第六鋪、長安右門、至外皇城以西、第十一鋪

以上該旗手濟陽、濟州、府軍、虎賁左、金吾前、燕山前、羽林前、八衛官軍分守

東華門左、盡左第十一鋪、東至東上門左

東華門右、盡右第一鋪、東至東上門右

東安門左、外盡左第十四鋪、內至東上南北門左、東安門右、外盡右第十四鋪、內至東上南北門右

以上該金吾左、羽林左、府軍左、燕山左、四衛官軍分守

西華門左、盡左第一鋪、西至西上南北門左。

西華門右、盡右第九鋪、西至西上南北門右。

西安門左、外盡左第十二鋪、內至乾明門左。

西安門右、外盡右第七鋪、內至乾明門右。

以上該金吾右、羽林右、府軍右、燕山右、四衛官軍分守。

玄武門左、盡左第五鋪、北至北上門、北上西門以左。

玄武門右、盡右第四鋪、北至北上門、北上東門以右。

北安門左、外盡左第十二鋪、內至北上西門外以左。

北安門右、外盡右第八鋪、內至北上東門外以右。

以上該金吾後、府軍後、通州大興左、四衛官軍分守。

凡各門守衛官、照依地方、各領銅符收掌、守衛承天門、承字號、東安門、東字號、西安門、西字號、北安門、北字號、俱陰文右比、畱守衛巡城官、領承字等四號銅符、俱陽文左比。

凡各門守衛官員、遇夜各領令牌、齋執巡警午門、領申字一號至四號、長安左右門、及東華門、領申字五號至八號、西華門、領申字九號至十二號、北安門、領申字十三號至十六號。

凡皇城、每日輪都督一員、帶刀千百戶一員、領申字十七號令牌、於內直宿、仍點各門守衛軍士、後都督裁革、改令五府僉書侯伯、每夜一員輪直。

凡內皇城四圍四十鋪。設銅鈴四十一箇。每更初。自闕右門發鈴。傳遞至闕左門第一鋪止。次日納鈴於闕右門第一鋪。夜遞如初。外皇城四圍七十二鋪。銅鈴七十八箇。每更初。自長安右門發鈴。傳遞至長安左門止。次日納鈴於長安右門第一鋪。夜遞如初。

凡內皇城左右每夕輪坐更將軍一百人。每更二十人。

凡內皇城四門。設走更官八員。於內府給領簿籍。每更各門官交互往來。於簿上用印一顆爲信。東華門官南至闕左門。北至玄武門。西華門官北至玄武門。南至闕右門。其三門官吏更赴東華。西華。二門。亦如之。隆慶五年。申明舊制。如總督。上直官怠弛。不行稽查者。參究。

凡官員人等出入四門。無牙牌者。附寫水牌。

凡外皇城各門設馬直百戶十八員。各領全伍以備隨駕。成化四年。革馬直官軍。選精壯者。補宿衛。

凡守衛官遇巡城官到來。將銅符比驗相同。方許點開。

凡皇城四門巡視。宣德三年。令常差御史一員。○天順元年。添差給事中一員。○成化十一年。令畱守衛官每日巡行各門。點開二次。○弘治二年。令每夜分行亦點開二次。○十年。令各門守衛官軍。隻日輪給事中。雙日輪御史及兵部委官點開。○正德四年議准。畱守五衛。每日輪指揮五員。領齋銅符巡點內外門鋪官軍。遇夜。每更一員。逐一點視。仍令各門守衛官。置簿一扇。送簿印鈴。門吏輪守。每巡點官到。即將

本人衛分職名。註於該日該更之下。不到。不許填駐。以便科道等官不時稽考。其守衛員缺。就令督同選補。○隆慶二年議准。畱守等衛指揮等官。兵部劄行巡視郎中。嚴行各衛。常時巡察。晝夜點守。季冬會同巡視科道。分別勤惰。從實參舉。勤職者陞用。曠職者降調問罪。○六年。每衛專設點城指揮二員。上下半月。分管點鬧。

凡守門內官。弘治十八年題准。輒城四門照舊。其餘各門。只以四員名爲則。不許增添。○隆慶元年議准。守門內官。止許專司啓閉關防鎖鑰。但有仍前違例點鬧。暗開騙局。科索官軍財物者。許官軍親訴科道。卽時參究。若各該官軍啓閉非時。或地方失事。各門官止許具本題知。不許挾私妄參。

凡各門進出事件。宣德五年。令每日從守衛官具奏。

凡守衛官。天順五年。令有懸帶金牌。棄置兵仗。擅離信地者。錦衣衛官校。并巡視給事中。御史拏送法司問罪。決杖一百。發遼東邊衛差操。○弘治元年。令皇城各門。各鋪上直守衛。該管官旗鈴束不嚴。及容情故縱。所管軍人離直。點視不到。十名以上者。各杖一百。指揮千百戶。衛所鎮撫。總小旗。以至於軍。各遞降如洪武榜例。調邊衛。帶俸食糧差操。所鎮撫亦降總旗。若受財賣放者。不分人賊多寡問罪。亦照前例降調。其畱守五衛。晝夜輪流點城官員。但受財賣放者。一體參問降調。若止是巡點不嚴。以致軍士不全。問罪還職。其各該直宿官旗軍人。點視不到一二次者。送問。三次以上者。問發邊衛差操。○正德四年議准。

營操官選補守衛者卽將營操除豁。○又題准守衛軍士有躲閒代替官有賣放私占辦納網巾菜蔬等項俱聽巡視糾儀科道等官參奏重治。○十六年禁約守門官科害軍人并各衛指揮千百戶人等指稱科斂賣放者從重治罪。

凡守衛官軍原額共八千三百三十三員名。天順元年令不許私相替換及賣放偷閒役使營私辦納月錢隱匿跟隨需索供應聽各官互相舉奏指揮以下犯者照例降調其內官內使止許役用三名或二名亦不許離直遠出違者該管并點閘官奏請發落成化間兵部奏請會同兵科揀選汰其老弱殘疾者退還原衛照數於各衛選補如不足則於五軍等營次撥官軍內選補弘治九年因各衛各營選補不足奏行團營頭撥軍入選補。○十六年題准各門守衛官員旗軍逃亡首補有願告的決及不肯守衛推稱的決罪犯違礙本衛官吏受囑輒改別差者俱聽比較官查參究治仍行法司不許將守衛首逃或爲事旗軍的決有礙收撥上直。○正德四年奏准凡守衛官軍聽點城科道等官督同該衛掌印官揀選不堪者退還營衛逃故者照數補足毋致缺少防衛。○萬曆二年議所選汰俱行職方司將清勾解到軍人驗補。○四年議准團軍逃故卽呈巡視等衙門著該營衛設法挨拏正身并勾其戶丁代替如果正身無獲別無戶丁方許照缺於五軍等三大營選補各該管把總等官逃軍十名以上者俟年終聽巡視等衙門一體查參重究。

凡查點守衛軍隆慶二年題准守衛官軍三日一班輪換務以辰時爲期必待新者至舊者方回如有先時而去及後時不來者卽作不到一次許畱守衛官查報治罪○又題准守衛官軍如查點一次不到者重責記簿二次不到者扣本月直米一半三次不到者全扣類總開送戶部臨倉扣除官軍通同欺隱者參究○五年題准內外周圍紅鋪兵部轉行巡視郎中嚴督官軍常川在鋪看守如遇換班亦須交代明白每月終具結投遞○又題准守衛官軍點驗正身置牌編伍約束稽查仍前影射躲避者事發依例遣發煙瘴衛分○六年題准將旗手等二十衛軍士備造各軍真正姓名年貌文冊仍置木牌明書年貌給與本軍懸帶務要牌冊相同聽各衙門不時點驗如有代替等弊參治

凡私役守衛軍正德九年奏准皇城內外守衛軍士各該侯伯并守衛內外等官不許擅撥做工違者許科道官劾奏治罪把總等官拏問照私役操軍例降級凡守衛軍器成化十二年令皇城守門內臣督令各該官軍俱照分守地方披戴盔甲列持器械逐人檢察其城外紅鋪并九門軍器等件亦要櫛架整齊以時執把俱不許散漫怠玩違者許點城官并兵部查問○正德四年題准凡各衛官軍盔甲器械有損折破壞者三年一換工部仍委官點視○十三年題准點城科道等官陸續揀選換補不拘限期○隆慶五年議准仍照舊三年一換○萬曆十一年題准每遇三年照例呈請兌換軍器各軍有老弱頂名者逐名更補

凡守衛官軍下班。萬曆十一年題准。守衛紅盔明甲官軍。每月除上直日期外。令下操三日。隸神樞八營操演圍子手。亦除分班更直外。隸五軍備兵營一體隨操。

凡皇城九門吏役關防。成化二十二年。令各鑄關防。凡錢糧文書進出用使。計關防共三十三顆。撥門吏共四十八名收管。其所支月糧俱在兵部役滿之日。武庫司起送吏部。午門吏四名。關防三顆。端門吏四名。關防三顆。承天門吏四名。關防三顆。長安左門吏三名。無關防。長安右門吏三名。關防三顆。東安門吏三名。關防三顆。東中門吏一名。關防三顆。東上門吏二名。關防二顆。東上北門吏一名。關防三顆。東上南門吏一名。關防二顆。西安門吏四名。關防二顆。西上門吏四名。無關防。西中門吏四名。無關防。北安門吏四名。關防四顆。北中門吏二名。關防二顆。北上門吏四名。無關防。

凡各門進納錢糧。弘治十四年。令所在守門軍士及門吏。邀索財物者。聽點城及巡視科道官參提問罪。凡常朝門禁。成化十二年奏准。每日長安左右門初開。先放常朝。及見辭等項官吏盡絕。方許驗牌放進。各監局工役人等。有攙越混進。及夾帶財物。入內買賣者。守衛官具奏治罪。○弘治元年奏准。朝參文武官。隨從官吏人等。俱官給木牌懸帶。守衛官辨驗放入。其謝恩見辭。工滿囚人。進春進曆。送納錢糧諸色人等。經該衙門給與牌面。事畢放回。人數多者。給印信手本。送守衛官照入。○正德四年題准。朝參官員跟隨工役照例。大臣三人。餘者一人。○嘉靖三年題准。公侯駙馬伯。并文武大臣。除朝賀陪祭。更換衣服。

及議事會審許帶執事官吏外。若常朝止許帶三人。其餘官員二人。俱要懸帶本衙門牌面。

凡朝門雜禁。成化七年奏准。各門守衛官軍。務遵舊制。嚴加搜檢。但有無名之人。及假帶牌面者。就便拏送究問。○弘治元年。令長安左右門。鹿角柵。與儻衆木內。正街空地。不許人畜作踐。污穢擠塞。犯者。許錦衣衛旗校緝拏。送問。○又令罷閒官吏。在京潛住。有擅入禁門交結者。各門官仔細盤詰。拏送錦衣衛。著實打一百。發煙瘴地面。永遠充軍。○七年。令長安等門。不許閒雜之人。出入賣物穿走。違者。許兵部及巡視官。將守門官軍參究。○十三年奏准。凡左道邪術。及燒煉丹藥之人。擅入皇城。夤緣求進。而守衛官軍不行關防搜拏者。參奏治罪。○嘉靖十四年題准。守衛官軍該直之日。不許擅離直宿。若有擔荷背負。或背闕踞坐。俛臥御橋。直趨禁道。及婦人假裝男子。入內訴冤者。擒拏。參送法司問罪。○隆慶五年議准。官員與馬牀扇。不許擁入東西長安門鹿角柵內。及軍民工匠人等。不帶牌面。及手本無名。并服色不正。器物應禁者。俱不許入。如有違者。許守衛官軍拏送巡視衙門參究。

凡守衛軍士食錢。洪武二十六年定。在京上十二衛守衛隨駕軍人。每名一直三日。食錢鈔三百文。先期一日。令各衛將軍名數目手本報進內府。兵部官一員攢類軍名。并該支鈔錠總數。送禮科關鈔。令該管守衛官領去給散。如有公差患病名數。食錢明白扣除。不許將軍人頂替冒支。

凡皇城四門廚房。洪武二十八年。各設恩軍爲守衛軍士。做造飯食。長安左右門廚房二所。恩軍二百二

十五名。管軍百戶二員。金吾前衛鎮撫司帶管。東安門廚房一所。恩軍九十七名。管軍百戶一員。羽林左衛鎮撫司帶管。西安門廚房一所。恩軍一百一十名。管軍百戶一員。金吾後衛鎮撫司帶管。○永樂七年以後。每官軍守衛三日。於京倉支直米五升。○正統六年。復設各門廚房。分調南京原額恩軍一百名。及於在京撥補共五百名。簡選百戶五員。分領造飯。○弘治二年。復停止造飯。每直三日。於各門內倉支米五升。各恩軍改隸內官監差使。輪派寶善門灑掃掛燈。正德二年奏准。不許分送做工。及別項差用。今除節年逃故外。見在止一百七十六名。仍隸內官監。分屬金吾前後羽林左右四衛帶管食糧。

○萬曆二年題准。旗手等二十衛守衛軍士。每月將見在守衛直宿官軍實數。并實支月糧文冊二本。赴司掛號。一本轉送戶部。撥倉支糧。其官軍該班不得支糧者。候下班補給。

凡牌面。洪武二十六年定。隨駕官員。力士。校尉。須憑牌面守衛。其牌面。內府印綬監掌管。輪直官員人等。於簿上明白附寫花名。畫字給領。如遇下直。務要交割明白勾銷。庶無差失。其在外新設衛所。申索守禦夜巡銅牌。須要定奪數目。編置字號。行移禮部鑄造。就送該部給發。○正德四年題准。尙寶司督同各守衛官。備查各衛銅牌。某衛該某號牌面若干。某牌係某軍懸帶。遇交班之時。必須兌換明白。方許回還。旗手等二十衛。年終各造文冊。送司備照。今附造年貌文冊內。該司仍委官查點。如有損失。將本軍并該管官員。參究治罪。責限挨尋。限外不獲。方許給補。

凡皇城外各鋪。萬曆十一年議准。每三年移咨工部修理。三年限內有作踐損壞者。將督鋪指揮等官參

治。仍責令修葺。不許科斂軍人。



明會典卷之一百四十四 兵部二十七

【力士校尉】王府校尉附

國初用力士校尉。隨從直駕。洪武二十六年定。於民間丁多相應人戶內。僉點有力精壯。無過犯體氣之人。應當撥錦衣旗手等衛著役。如有事故。卽照原籍另戶僉補。如解到部。照依所補姓名送發該衛。果係在逃正身。就送該衛發落。若正身不獲。解到戶丁。照地方發遣充軍。仍挨勾正身後爲定例。初力士隸旗手衛。後亦隸錦衣。及騰驤四衛。惟校尉隸錦衣衛如故。

凡力士校尉收充。天順二年奏准。民人投充力士校尉者。行原籍官司。查無違礙。方准收役。○六年。令凡人材不識字者。改充力士校尉。女戶欽陞官員。子孫例無承襲者。將軍子。試量身力不及者。俱收充校尉。○成化十四年奏准。力士校尉病故。或老疾不能應當。其子孫告替補者。行移該衛。查係在營生長冊籍有名。無違礙者。具奏收役。雖例不勾丁。而子孫願替補者。亦准查收。○弘治十三年奏准。凡校尉事故。須冊籍內親子弟姪替補。若將別姓詐冒替補者。問罪。官旗調外衛差操冒替之人。亦調衛充軍。○嘉靖二年題准。錦衣衛將軍事故。不係侍直年深授官者。止許親男收充校尉一輩。不許將弟姪及房族認戶人等收補。躲避民差。○三年議准。錦衣等衛力士校尉。不許買窩冒頂及異姓外孫女戶。買求該管官旗州